

BAB 6: PENUTUP

6.0 Pendahuluan

Bab ini adalah merupakan rumusan keseluruhan terhadap hasil penyelidikan dengan memberi fokus terhadap pencapaian objektif keseluruhannya.

6.1 Tujuan Kajian

Kajian ini adalah bertujuan untuk melihat pemilihan bahasa komuniti Bugis di Kampung Parit Keroma (KPK), Ayer Baloi, Pontian, Johor di domain rumah, domain intra -komuniti dan domain pekerjaan. Seterusnya membuat perbandingan pemilihan bahasa oleh komuniti yang sama tetapi telah menetap di Kuala Lumpur dalam domain yang sama.

6.2 Metodologi Kajian

Metodologi yang digunakan dalam kajian ini ialah soal-selidik kepada 100 orang responden di KPK dan 20 orang responden dari KPK yang telah menetap di Kuala Lumpur, rakaman perbualan yang dibuat di 15 buah rumah sebanyak 21 rakaman perbualan dari pelbagai peringkat umur, temu-bual dengan lima orang responden tua dan mengambil bahagian dalam pemerhatian terhadap 10 keluarga etnik Bugis di KPK dan 4 keluarga Bugis di Kuala Lumpur. Mengambil bahagian dalam pemerhatian adalah berdasarkan teori Hymes (1972) iaitu kajian Etnografik di mana penulis mendapat gambaran sebenar pemilihan atau penggunaan bahasa responden, dengan siapakah mereka menuturkan bahasa tersebut dan bilakah mereka menggunakan bahasa tersebut.

6.3 Dapatan kajian

Komuniti dalam kumpulan umur 70-89 tahun yang begitu kuat berpegang mempertahankan bahasa Bugis sudah semakin berkurangan. Kini yang tinggal adalah komuniti dari kumpulan umur 50-69, kumpulan umur 30-49 yang dwi-bahasa dan seterusnya kumpulan umur 13-29 yang sudah tidak tahu bertutur dalam bahasa Bugis. Ini merupakan satu fenomena yang sangat membimbangkan bagi kumpulan etnik Bugis yang merupakan satu kumpulan etnik minoriti di Malaysia.

Bahasa Bugis di KPK boleh dikategorikan sebagai Bahasa Pinggiran dalam Weber (1991:301). Iaitu bahasa yang masih mempunyai penutur tetapi semakin berkurangan dan bahasa ini tidak mendapat tempat atau keistimewaan di dalam masyarakat. Bahasa ini dipinggirkan kerana ia tiada kepentingan dan tidak mendapat bantuan kerajaan untuk memeliharanya daripada terus pupus. (Sila lihat Weber 1991:301) mengenai tekanan-tekanan bahasa). Bahasa Bugis dipinggirkan oleh komunitinya sendiri oleh kerana status bahasa Melayu sebagai bahasa kebangsaan dan bahasa Inggeris sebagai bahasa bahasa antara bangsa di Malaysia.

Boleh dikatakan Bahasa Bugis mempunyai kemungkinan akan pupus kerana penggunaannya yang semakin berkurangan akibat jumlah penuturnya yang semakin berkurang walaupun budayanya tidak terjejas. Ini kerana komuniti Bugis begitu berpegang kepada budaya seperti adat dalam perkahwinan, adat naik buai untuk menyambut kehadiran bayi yang baru lahir, makanan-makanan tradisional dan acara-acara keagamaan dan perayaan yang masih lagi disambut dengan begitu meriah. Ini adalah satu petanda bahawa masih ada harapan untuk mengekalkan bahasa Bugis.

Sebagai satu kumpulan etnik yang minoriti di Malaysia dan dengan wujudnya kekangan-kekangan ke arah mengekalkan bahasa Bugis, kini lahir kesedaran di kalangan komuniti berumur 50-69 untuk memelihara bahasa dan budaya Bugis daripada terus pupus. Pada masa sekarang ada inisiatif seperti menggalakkan kahwin saudara, pengekalan budaya dan penjagaan budaya oleh penduduk bangsa Bugis di Kampung Parit Keroma. Dengan kesedaran ini juga lahirnya Muzium Bugis di Pontian yang mengumpulkan pelbagai khazanah peninggalan Bugis seperti pakaian, alat tenunan, senjata, pinggan-mangkuk, dan hasil penulisan Bugis.

Persatuan Anak-anak Bugis Johor juga telah ditubuhkan di mana beberapa aktiviti telah dijalankan seperti perjumpaan Hari Raya pada setiap tahun dan melawat Tanah Ogi atau Tanah Bugis di Sulawesi.

6.4 Perbandingan di antara Responden di Kampung Parit Keroma dan di Kuala Lumpur

Secara keseluruhannya komuniti Bugis di kampung masih berpeluang menggunakan bahasa Bugis secara meluas kerana tinggal di dalam satu kampung yang majoritinya Bugis berbanding dengan komuniti yang sudah menetap di Kuala Lumpur di mana penggunaan bahasa Bugis amat terhad. Walaupun begitu penulis mendapati di kampung sudah berlaku proses peralihan bahasa di kalangan komuniti Bugis di domain rumah dan sesama etnik. Proses peralihan bahasa ini amat ketara kepada kumpulan umur 13-29. Jika dirujuk kepada kumpulan umur 70-89, 70-100% penggunaan bahasa di rumah adalah bahasa Bugis. Manakala kumpulan umur 13-29 hanya 3.4%- 6.7% sahaja di kalangan mereka memilih menggunakan bahasa Bugis di rumah. (Sila rujuk Jadual & Rajah 4.8).

6.5 Cadangan kajian Selanjutnya

Kajian ini hanya berfokus kepada kaum etnik Bugis di Kampung Parit keroma untuk melihat penggunaan bahasa Bugis di kalangan komuniti di domain rumah, intra-komuniti dan kerja serta perbandingan komuniti Bugis yang telah menetap di Kuala Lumpur. Melalui pilihan bahasa kita melihat berlakunya proses peralihan bahasa dan tanda-tanda kepupusan bahasa di kalangan mereka. Oleh kerana kajian ini adalah terhad saya mencadangkan kajian selanjutnya dijalankan dan bidang kajiannya lebih luas seperti meninjau pengekaln dan pengalihan bahasa Bugis oleh kaum etnik Bugis di negeri Johor. Selain daripada itu, kajian lain yang boleh dibuat ialah mengkaji perubahan bahasa Bugis iaitu dari segi fonetik dan morfologinya. Adakah terdapat perubahan dari segi bentuk sesuatu perkataan atau adakah bahasa lain diambil dan diterima pakai dalam bahasa Bugis?

6.6 Kesimpulan

Faktor pemilihan bahasa di kalangan etnik Kg Pt Keroma adalah bergantung kepada kepentingan bahasa Melayu. Oleh kerana komuniti Bugis ini adalah terdiri daripada etnik minoriti dan tinggal di dalam negara Malaysia yang memerlukan bahasa Melayu sebagai bahasa rasmi, maka mereka memilih bahasa Melayu dan mengeneipkan bahasa Bugis yang merupakan bahasa ibunda dan bahasa identiti mereka. Walaupun begitu generasi yang lebih tua masih mempunyai kesetiaan kepada bahasa Bugis iaitu mempunyai Etnolinguistik Vitaliti (Giles et al , 1977) yang tinggi berbanding generasi yang lebih muda. Faktor umur juga boleh dikaitkan dengan pemilihan bahasa kerana generasi tua 70-89 tahun masih berkomunikasi dalam bahasa Bugis di domain rumah dan intra-komuniti. Kumpulan umur 50-69 dan 30-49 merupakan penutur dwi-bahasa dan banyak berlaku Code-switching (pertukaran kod) dan Code-mixing (percampuran kod) di dalam perbualan mereka,

manakala peringkat umur 13-29 majoriti penutur menggunakan bahasa Melayu sebagai bahasa yang dominan.

Di samping itu faktor kahwin –campur yang dinyatakan oleh Putz (1991) pada mulanya merupakan penyebab peralihan kepada bahasa yang lebih dominan tetapi bagi etnik komuniti Bugis di Kg Pt Keroma khususnya golongan yang lebih muda walaupun berkahwin sesama etnik, penggunaan bahasa Bugis adalah terhad dan mereka lebih suka berkomunikasi menggunakan bahasa Melayu dengan anak-anak mereka.

Faktor migrasi (May 2002) juga memainkan peranan penting di dalam pemilihan bahasa dan pengalihan bahasa etnik komuniti Bugis di Kg. Pt Keroma. Ini terbukti berdasarkan komuniti Bugis yang telah berpindah ke Kuala Lumpur di mana majoriti menggunakan bahasa Melayu di kesemua domain berbanding komuniti yang masih menetap di Kg. Parit Keroma di mana majoriti penduduknya adalah Bugis dan masih berpeluang berkomunikasi dalam bahasa Bugis terutama dengan orang yang lebih tua .

Faktor Lakuan Identiti (Gal, 1979) juga merupakan faktor etnik minoriti Bugis beralih kepada penggunaan bahasa Melayu. Walaupun etnik Bugis berbangga menyatakan yang mereka adalah Bugis tetapi untuk diserap ke dalam masyarakat dan diterima dalam masyarakat Malaysia terutama di dalam bidang pendidikan dan pekerjaan mereka terpaksa menggunakan bahasa Melayu.

Berdasarkan faktor-faktor yang disebutkan komuniti Bugis lebih memilih menggunakan bahasa Melayu kerana kepentingannya di Malaysia berbanding bahasa Bugis sebagai bahasa komunikasi di domain rumah. Proses ini lama kelamaan akan bertukar kepada pengalihan bahasa. Oleh itu, pengalihan kepada bahasa Melayu perlu diambil perhatian serius supaya bahasa Bugis tidak akan hilang atau pupus. Komuniti etnik Bugis perlu mencari inisiatif seperti membuka kelas-kelas belajar bertutur dan menulis bahasa Bugis kepada anak-anak supaya bahasa Bugis ini terpelihara daripada pupus. Dokumen-dokumen

yang ditulis dan dibukukan di dalam transkrip Bugis seperti cerita-cerita atau kitab-kitab agama yang masih ada dalam simpanan generasi tua perlu dipelihara dan dijaga untuk generasi akan datang sebagai satu khazanah peninggalan nenek-moyang etnik komuniti Bugis.

Secara keseluruhannya pemilihan bahasa di kalangan komuniti Bugis di Kampung Parit Keroma lebih cenderung kepada pengalihan kepada bahasa Melayu yang merupakan bahasa rasmi dan bahasa kebangsaan bahasa Malaysia dan hanya kesedaran yang lahir dari komuniti Bugis ini sendiri untuk sama-sama berusaha mengekalkan bahasa Bugis yang merupakan identiti mereka daripada terus lupus.